

Apocalipse

Deuxu heka Joaõ-ò bede ritỹnynyre

¹ Katyyriti-ki tahe bede aõmydỹỹnana roire. Kia heka Deuxu Jesuisi-ò ritỹnynyre. Idi Kristu Joaõ-ò ritỹnynyre. Aõhebo ele elemy rotỹỹnykre heka inydeereny riteòsinyreri, teòdu mahãdu wahe. Ýjuõ heka Kristu riteònyre Joaõ-ò ibutumy relyykemy, ritỹnynykemy. ² Iribi tahe Joaõ ibutumy relyyre. Kaki heka riritinyre. Kia heka ijyy rare. Jesuisi Kristu inatyhyna rare. ³ Inyõ katyyriti-di rariakeki, eysamy ratxireri. Inyõ kiamy roholakeki, eysamy ratxireri. Inyõ kia rityhynykeki, eysamy ratxireri. Bededỹỹnana dori iòhòmy ratxireri. Kia ibutumy rotỹỹnyke.

⁴ Jiarỹ heka, Joaõ wahe, dohodỹỹna mahãdu-ò watyyriti rewahinyreri. Debò inatxi reurò mahãdu Asia bedeki watyyriti rewahinyreri. Ruxetòena, ywina-wana adeereny kanakemy idi watxireri. Deuxu-ribi dori ratxireri, ihetxiu rare, tule tiemy rarekre. Tii dori ruxetòena adee riwahinykre, tule irynana tyytyby riwahinyke, debò inatxi reurò mahãdu wahe. ⁵ Jesuisi Kristu tule adee kia riwahinykre. Tii tahe inatyhyna ijyydu rare. Tii juhUU rubu-ribi ixixadu rare. Tii ibutu iòlò dinodu heka tii rare. Tii inyluure. Inyòraru iny-ribi tii riwatarenyre tahãlubu òraru-ki. ⁶ Tii Xiwe wahidỹỹdu mahãduõ ixidee riwinyre, inyboho wahe. Ibutumy ityhydỹỹdu heka xiwe wahidỹỹdu mahãdu wese rare, iòlò

mahãdu wese wahe. Deuxu rekealàmhyhÿke. Ibutumy wowydyna, ruru-wana heka Jesuisi Kristu-ò rawahidÿÿmy rarekre ihyy hyymy. Kie ⁷ Beteheke, tii biuwetykywo-ki naderi. Ibutumy iny tuu robikre. Irubudÿÿdu tule tuu robikre. Ibutumy iny rahinykre, robukre iòraru-ki. Inatyhy rare. Kie.

⁸ Jiarÿ AA rare YY rare. Juhuu ludu rare, tule ikonana ludu rare. Deuxu jiarÿ rare ibutu ruru wahôrô rare. Aõu aõu jiarÿ watxiwãhãre.

⁹ Jiarÿ Joaõ rare, aityhydÿÿdu seriòre wahe. Jiarÿ tule awese aõhebo ratÿÿnyre. Jesuisi Iòlòna òraru-ki. Patmos bedebute-ki jiarÿ ratxire, ròtena wese heka tai ratxire. Jesuisi inatyhyna dori retÿÿnyre. ¹⁰ Nobiutxuõ heka jiarÿ aõma Deuxu Tyytybytyhy wadee dobehede. Iu tahe rybeõ-ò raholare, juròna wodÿÿ wese heka rare. ¹¹ Tahe wadee rarybere: –Biritinyke aõma ibutumy aõbo kai bobikre. Ibutumy dohodÿÿna mahãdu-ò kia tyyriti biwahinyke. Ka tyyriti tahe biteònyke heka debò inatxi reurò hãwã-ò: Efesu hãwã-ò, Esmirna hãwã-ò, Pergamo hãwã-ò, Txiatira hãwã-ò, Sardesi hãwã-ò, Filadelfia hãwã-ò, Laodisia hãwã-ò. ¹² Retehera wahewo-ò mobo wadee rarybereò. Tahe debò inatxi reurò loosòna mynynalemy rabira, womati tÿrÿrÿÿle wahe. ¹³ Itya-ki tahe hãbuõ wese rare. Ityky urarehe heka ratxire. Iwereysana heka womati tÿrÿrÿÿÿ heka rare wyò wòtena-ki roire. ¹⁴ Irade iurahakÿ ratximyhÿre. Irue heka heòty wese rare. ¹⁵ Iwa tahe bronze womati wese rare. Irybe wodÿÿ heka bee ijiranahakÿ wese heka rare. ¹⁶ Iruruwe-ribi debò-ki heka taina debò inatxi reurò sõwe

rimyre. Irybe mayrehe wiòtxu wese iry-ribi ròhònymyhÿre. Iòsÿny tahe txu tòtee wese heka rare, itÿnytyhyre. ¹⁷ Kia ibutumy rabireu, jiarÿ resera bede-ò rubu wesemy. Tii ruruwe-ribi debò watyre-ki ritidire, rarybere: —Buberuòtyhy! Jiarÿ juhuludu rare, ihewoludu rare. ¹⁸ Jiarÿ rurure, iribi tahe rexixare rubu-ribi, aõu aõu tahe jiarÿ watzireri. Tiu aruruòtyhy. Rububede dinodu heka jiarÿ watzireri, ityre waruru rare. ¹⁹ Biritinyke ibutumy tuu tabita wiji. Tule aõbo idi kanakemy biritinyke. ²⁰ Adee aritÿnynyke aõbo kia ibutumy rare. Debò inatxi reurò taina heka wadebò-ki rare. Kia taina heka dohodÿÿna mahãdu ÿju wese rare. Loosòna mynyna heka dohodÿÿna mahãdu wese rare.

2

¹ Kia heka biritinyke Efesu dohodÿÿna ÿju-ò: —Kaa heka inyõ rybe rare. Tii taina debò inatxi reurò rimymy idi rÿimyhÿ iruruwe-ribi debò wahe. Tii loosòna mynyna yky-ki rariareri. Kia womati tÿrÿrÿhÿkÿ-di relere wahe. ² Aaõmysÿdÿÿna wiwihikÿ reeryre, awoxieresytere tule. Hãbu bina tiu aitxerenaõna toite. Inyõ Deuxu deòdumy iximy uritere rybedu, teurihitenyte. Kia iruirybe teerytenyte. ³ Kaiboho tawoxiererenytenyte. Tule aõhòkÿmy tatÿÿnytenyte waòraru-ki, wijile tule wahe. ⁴ Kiaremy tahe sohojile wadee ibinare. Iwese juhoo waluu wesemy aõkõ wiji ahãtenyte. ⁵ Kaiboho heka atyhyna-ribi ahewo-ò tadòòsetenyte. Kiaremy ta idi bexinohòtinymy bexirãhÿbenyke. Iwese juhoo atximahãte wese,

ixityre boibekemy. Kiamy aõkõkeki, aloosõna mynyna ay-ribi aritakre. ⁶ Kiaremy ta akireny sohojile awire wadee. Kaiboho heka Nikolaita mahãdu iaõaõna widỹỹ derarenyre wawesemy. ⁷ Iny rybeõ ijohona mahãdu boholabenyke Deuxu Tyytybytyhy rybe-ò timybo Ityhydỹỹdu mahãdu-ò rarybemyhỹre: —Inyõ òraruna ijesu ritakeki, tamy jiarỹ umytuedeõna ariwahinykre. Kia tahe Deuxu bederaty ritokre, Deuxu oworu-ki rỹimyhỹre wahe. Kia bederaraty inyru wahidỹỹdu rare.

⁸ Kia heka biritinyke Esmirna dohodỹỹna ýju-ò: —Kia heka Juhuuludu rybe rare, Ihewoludu rybe rare. Tii rururibile rexixare. ⁹ Aõhõkỹmy dỹỹnana reerymyhỹre. Uriterenodu wesemy toite. Ihãre tahe aõna aõnawiwi ahõrõreny rare. Aòludu mahãdu umy rarybereri ibinamy. Tiiboho Satanasi mahãdu roire. Judeu mahãdu aõkõ roire tiiboho tuu raryberekãre. ¹⁰ Buberuõtyhy kaiboho! Aõhõkỹmy dỹỹnanaõ kanakre debò wiò txumy wahe. Tahe buberuõtyhyke. Ròtenawo-ki boibenykre. Burubenyke hãrele heka òbitimy biwatyhynybenyke. Iribi tahe irudỹỹna rataana adee ariwahinykre. ¹¹ Kaiboho nohõti-di mahãdu, boholake timybo Deuxu Tyytybytyhy heka ityhydỹỹdu mahãdu-ò rarybemyhỹre.

¹² Kia heka biritinyke Pergamo dohodỹỹna ýju-ò: —Kia inyõ rybe rare. Tii mayrehe wiòtxuree ðire:

¹³ —Jiarỹ reeryre asỹ, ahãwã wahe. Kaiboho Satanasisỹ-ki tasỹnyteri, irynana rareri wahe. Tahe Kaiboho aityhydỹỹna teriõtenyete. Tai tiiboho warybedu Antipasi òbiti rirubun- yrehãrele.

14 Ihãre tahe akireny sohojile wadee ibinare. Ayreny-ki inyõ Balaaõ erydỹyna rityhynyre. Tii ihetxiu Balake òraruna-txi aatysydỹmy ribedeerydỹnyre resedỹkemy. Tii Israeli mahãdu-ò rarybere:

—Xiwena aõma ide tahe biròbenyke tule òta tahe urihimyo tahe ibinare.

15 Tule ayreny-ki tahe Niolaita tohodỹyna ijõreny rityhynyre, timybo rexiòrarunanykemy. Kia ibinare wadee. 16 Tai marybeke tiiboho rexirahĩkemy idi iribi rexixãwidỹnykemy. Tukõkeki, anakre warymayrehe wiòtxuree-di iòludumy areakre wou-ki.

17 Iny nohõti-di mahãdu, bohólake Deuxu Tyytybytyhy rybe-ò timybo Ityhydỹdu mahãdu-ò rarybemyhỹre: —Inyõ òraruna ijesu ritakeki, tamy biu-ribi rỹsỹna rỹikre. Manauratyre-ki heka nii tỹmyra raritimy roire. Òmo nii rieryõre. Tunidukrele rieryre.

18 Kia heka biritinyke Txiatira dohodỹyna jỹju-ò: —Kaa heka Deuxu Riòre Rybe rare. Iruè heka heòty wese rare. Iwa bronze womati wese rare. 19 Aaõmysỹdỹyna reeryreri, luuna, ywina, tyhydỹyna, juhúu ratyre wiji aaõmysỹdỹyna.

20 Kiaremy tahe sohojile wadee ibinare: Kaiboho heka Jezabel teijemahãtenyte. Kia hãwyy dori Deuxumy rybedu ix-di rare. Ihãre tahe òtaòtamy, xiwe rỹsỹmy rotohodỹmyhỹre, ritxoo hõrõ wahe.

21 Jiarỹ tule txiò reijere òtaòta-ribi ixãwikemy. Tahe tuuõhyyre. 22 Idi herina-ò arilidikre ihãbu mahãdu-wana. Tai aõhõkỹmy rotỹnyrenyke. Tiiboho kia rexirãhĩnyõrenykeki, tuu ele elemy ariwinykre. 23 Iriòre bina arirubunykre. Tai

ibutumy aõwidỹĩnamyna ityhydỹĩdu mahãdu riwaerykremy. Jiarỹ heka inywo erydu dori rare. Kiaremyta iny sohoji sohoji ariõwynykre. ²⁴ Ayreny-ki tahe inyõ rỹire. Tiiboho bedeeryna bina rityhynyrenyõre. Tiiboho bedeeryna bina rieryõhyyre. Txioinihe, bede ywina sira aõkõ adeeremy ariwahinykre. ²⁵ Iwese kaiboho tetyhynyte wese wiji bityhynybenyhyyke. Ele ele dori arehemynykre. ²⁶⁻²⁸ Kaiboho heka õraruna ijesu bitakeki, adeeremy ruru ariwahinykre. Kaiboho ihyymy wadeewimy biwinybenykeki, bede bede dinodu mahãdumy boibebenyke, iwese ruru Waha-ribi remyra wese wahe. Tamywikeki womati õhõte-di bede bede mahãdu rihukre, iwese butxi ribõhõnyre wese wahe. Tule adeeremy ariwahinykre aõma biuraso taina wahe. ²⁹ Iny nohõti-di mahãdu, boholake Deuxu Tyytybytyhy rybe-ò, timybo tii ityhydỹĩdu mahãdu-ò rarybemyhỹre.

3

¹ Kia heka biritinyke Sardesi dohodỹĩna jũu-ò: —Deuxu Tyytybytyhy debò inatxi reurò dinodu, taina debò inatxi reurò dinodu kia rybe rare: —Aõhebo tatỹĩnymahãtenyte reerymyhỹre. Arumy anireny ratỹnymyhỹre ihãre tahe tarumy ahãtenyte. ² Bexirawahatebenyke ainatyhydỹĩna-ki, urikõ-ribi kiemy ixãwiheny. Deuxuko-ki awityhymy aõkõ ixi-di textiemyhỹtenyte. Kia reerymyhỹre aõmysỹdỹĩnareny tewinymahãte. ³ Inatyhyna juhu taholatenytedi, bexinohõtinybenyke. Idi bityhynybenyke aõnanabina-ribi bexirãhĩke. Tukõkreki wasidu

wese ierykōmy adeereny anakre. ⁴ Ihāre tahe Sardesi hāwā-ki inyō reximymy òbitimy rarekremy ihÿre. Tiibohe wahe-ki tyky lyra urahakÿ-di kanariarenkyre kiemy dori òbitimy reximyrenyre. ⁵ Mobo ròtarenkyre, tyurahakÿ-di rexytyynyrenkyre. Inireny Rutyryiti-ribi aritaōtyhy. Idi Wahakō-ò wahōrōrenymy aritÿnykre tule iÿjuko-ki. ⁶ Kaibohe nohōti-di mahādu, bohohake timybo Deuxu Tyytybytyhy heka, ityhydÿÿdu mahādu-ò rarybemyhÿre.

⁷ Kia heka Filadelfia dohodÿÿna ÿju-ò biritinyke: —Kaheka inatyhymy Deuxu deòdÿÿna rybe rare, òbitimy nodu wahe. Tii Davi ijò rayna dinodu rare. Tii ijò riraynykeki tiu inyō riratòbònyōtyhy. Tii riratòbònykeki tiu iny riraynyōtyhy. ⁸ Aōhebo tatÿÿnymahātenyete reeryre. Akyhynakōmy atximahātenytemy rieryre warybe dori tetyhynymyhÿtenyete. Tai ijò adeereny reraynyra. Tii inyō riratòbònyōtyhy. ⁹ Bodoholabenkyre. Satanasi mahādu heka Judeumy rexininimyhÿre tukōdu hārele. Idi adidydenkyre akoreny-ò tatiowotimy kedeseke. Iu aluurenymy riwaeryrenkyre. ¹⁰ Aōhōkÿmy dÿÿnana kanake ibutumy iny urihidÿÿmy. Kaibohe warybe tetyhynyta, ywina-di tetyhynyta. Tai ilau arayrubunyrekyre. ¹¹ Ele elemy dori adehemynkyre. Ahōrōreny biyrubunyre inyō aribi rawasinyheny arudÿÿna rataana wahe. ¹² Oraruna ijesu inyō ritakeki. Tii ixbyby rubumy ruruōkre. Tii Deuxu heto-ki rasÿnyihyykre. Deuxuni ityre raritinykre tule Kristuni tÿmyra wahe. Jerusalēni tÿmyra tule ityre raritidÿÿmy

rỹikre, biu-ribi dobehede wahe. ¹³ –Iny nohōti-di mahādu, boholake Deuxu Tyytybytyhy rybe-ò timybo ityhydỹỹdu mahādu-ò rarybemyhỹre.

¹⁴ Laodisia hāwā dohodỹỹna mahādu ŷju-ò heka biritinyke: –Kie rybe kaa rare. Tii inatyhyna inatyhy rybe rare. Tii Deuxu-wana bede relereu, ratximyhỹ. ¹⁵ Aōhebo tatỹỹnymyhỹtenyte ibutumy reeryre. Ainatyhyna-ki inatyhymy aōkō, txiōlemy aōkō toite tule. ¹⁶ Tai tahe iòraru-ki ixi-ribi aratarenykremy rexinohōtinyre. ¹⁷ Kaiboho tarybetenyte: –Waaōwiwi-di roire. Awityhymy watzirenyreri. Wadeereny aō rasiranyōhyreri. Idi urile texibònytenyteri. Kaiboho dori abina, iaōkō mahādu, adehekỹ, aruety toite. ¹⁸ Kia aratohonykre: –Waribi womati tỹrỹrỹhỹkỹ aworibityhy biōbranykre, aityhynamy wiwihikỹ. Tasỹse tyyurahakỹ tule, ade wòtenamy. Tasỹse rueluahina tule, arue ywinamy. ¹⁹ Waluuna mahādu òhòte-di aribedeerynymyhỹre warybemy tule. Tahe eryrewemy aōsusu-ribi bexitabenykre wadee. ²⁰ Bodoholabenyke. Ijò-ki rarymy watzireri. Inyō roholakeki ihetowo-ò aralokre. Tai tii-wana ariroxikre. ²¹ Òraruna ijesu inyō ritakeki, tii wawana waryna-txi ronykre iwese jiarỹ waha-wana nadonymyhỹde wese. Ròtare dori wawouna-ki. ²² Iny nohōti-di mahādu, boholake Deuxu Tyytybytyhy rybe-ò, timybo tii ityhydỹỹdu mahādu-ò rarybemyhỹre.

4

¹ Iribi tahe biu-ki ijòm y rabira rasina wese. Rybeō raholare, jurònajurò wesemy. Iwese wadee rarybere wese. Kiamy narybede: –Mana

òwònyke, aõhebo itxõmo rahudi rotỹỹnykre ini ariteõsinykre. ² Iule tahe Deuxu Tyytybytyhy riwamyre. Iu, inyõ rynanamy rabira biu-ki. ³ Iõsỹny heka roosõnymyhỹre womatiwiihikỹ rỹsỹ wese, Jaspe wesena, Sadonio wese. Uwajiõ wixira tỹre heka rare iryna rirurawonyre. ⁴ Tahe 24 ryna iryna rirurawonyre. Ityre tahe 24my wedu mahãdu ronyre tyurahakỹ-di. Irati-ki womati tỹrỹrỹhỹkỹ-di rarataanany. ⁵ Biudelaa, biumyta, irynana-ribi dohonyde. Heòtyloo heka debo inatxi reurõmy sõwe iko-ki rỹire. Kia heka Deuxu Tyytybytyhy tuu sõwedu rare. ⁶ Tule iko-ki mana aho roire iuramy raurananyre. Irurawona-ki wiòwiò-ki aõni inaubiòwa rãire, irue sõwe ihewo-ki, iko-ki. ⁷ Aõni delena heka hãlòhehikỹ wese rare. Ijõ heka karõtihikỹ wese rare. Ijõ tahe hãbu òsỹny wese rare. Ikonanareny tahe nawiihikỹ dowõmy nade wese rare. ⁸ Ibutumy tiiboho debò sohoji reurõmy tesõwereny. Ta tiiboho tetya wirawyò rawyò irue dire. Tahe tiiboho rexielehynyõhyylemy txumy rumy rawiunymyhỹ: —Òbitityhy tate, Òbitityhy tate, Òbitityhy tate Inynyrỹ Deuxu rurutere. Kai tate, tule kai mabekre. ⁹ Kia heka inaubiòwa boho rawiunyre: —Wowydyna, àlàna-wana rynana-ki rỹdu-ò, iki kiemy nodu-ò wahe. ¹⁰ Iu tahe 24 wedu mahãdu heka tatiowotimy taòsỹny sutxi ritidimy riwowydynymyhỹreny resemy iko-ò. Tamy tarataana-di rehumy raryberenyre. ¹¹ — Wadinodureny, waDeuxureny adee sohojile heka wowydyna, loosõna, àlàna rawahike. Ibutumy dori aõna aõna tewinyte. Adeewimy rỹimyhỹre idi

rariamyhÿrenyre.

5

¹ Ryna-ki rÿdu ruruna debò-ki heka tyyriti werywery wesemy rabira. Tyyriti tahe wirawyò rawyò-ki iriti dire, tii debò inatxi reurò iratòbòna sòwe. ² ÿju ruru ruruhukÿ-my ryrymy dÿÿraxi-di: —Mobo ityhykre tyyriti ratòbòna aresydÿÿdukre iraydÿÿ-ki tule. ³ Tai tahe inyò ijòhÿyre: —Biu-ki, bede-ki, surawo-ki ijoòhÿyre. ⁴ Inyò ityhyòre iraydÿÿ-ki tamy itxere-ki. Iòraru-ki ta urile jiarÿ rahinymyhÿre. ⁵ Iule tahe matuariò wadee narybede: —Hiòmyke, betehe ta inihe Juda mahãdu hãlòhehekÿ-ò, Iòlò Davi iriòre riòre wahe. Tii dori tyyriti ratòbòna riorokre idi riraynykre, tii sohojile dori wou-ribi ròtare. ⁶ Kiamy tahe rabira, Budoeni Riòre wahe. Tii rynana ubey-ki rÿimyhÿ. Aõni inaubiòwa ijòre. Tiiboho-wana tahe matuari mahãdu rÿire. Budoeni rurure wesemy rÿire. Iò tahe debò inatxi reurò rare. Iruè tahe tule. Kia rare Deuxu Tyytybyò rare, tii bede bedemy nodu mahãdu. ⁷ Budoeni riòre tahe rynana-ki rÿdu ruru debò-ribi ditade, aõma tyyriti wahe. ⁸ Iule ta aõni inaubiòwa, 24 matuari boho-wana tatiowotimy rejujure buddeni riòreko-ò. Tii sohoji sohoji wiuna-di, womati tÿrÿrÿhÿkÿ hyna-di ratximyhÿreny. Sohoji sohojiro-ki tahe òwòrusò wydysilÿnywi-di wese rare. Kia Deuxu tyhydÿÿdu mahãdu ìxitòedÿÿna violão wese tule ratximyhÿreny. ⁹ Tiiboho wiutÿmyramy rawiunymyhÿrenyre kamy wahe: —Kai atyhy tate Tyyriti raydÿÿ-ò, iratòbòna eresydu tule. Arubumy heka Deuxu-ò

Ix̄yju ix̄yju teōbranyte. Irybe wixira wixira, ibede wixira wixira iix̄yjana tule.

¹⁰ Iòlòm̄y tewasynytenyete Deuxu dee tule xi-wena wahidỹỹny mahādu wahe. Idi hāwā hāwā ariwedunyrenykremy. ¹¹ Ÿju sōwetyhymy rā-bira rynana werora-ki, aōniboho matuariboho tule. Miliaō hōkỹmy rasōwerenyre. ¹² Tiiboho rirajuahakỹmy rawiunymyhỹrenyre: –Wowydyna, ruruna, deysana, àlàna, loosòna tamy sohojile rawahinyrenyke buddèni riòre-ò. Tii dori rurure ityhymy ¹³ Tai tahe ibutumy biu iròdu iròdu, suityre iròdu, bera iròdu iròdu ibutumy aōna tule rawiunymyhỹrenyre rynana-ki rỹdu-ò. Budoeni riòre-ò tule kia rawiunymyhỹre. Rarehykyle, rarehykyle heka rarekre. Kie. ¹⁴ Aōni inaubiòwa rirawyònyre: –Kie, Matuari 24 tahe reserenyre iko, kiemy noduko-ò.

6

¹ Tahe Budoeni riòre heka tyyriti ratòbònaō riòròre. Kiamy rabire. Tule aōni inaubiòwa mahādu-ò narybede rybenihikỹmy biummyta wodỹỹ wese. Mana ini itxeremy. ² Tai retehere awaru urahakỹmy rabire. Tairỹdu iwaxiwahate dire. Tamy irudỹỹna rataana riwahinyrenyre. Tahe rare wou ròtakremy.

³ Tahe ijō ratòbòna riorore. Ijō aōni tahe narybede inatxina wahe: –Mana ini itxeremy. ⁴ Idi awaru sòhòkỹ ròhònyre. Inyō ityre rỹdu-ò ruruna riwahinyre, wou ritelenykemy bede bedemy. Tai hābu mahādu wii rahukremy. Tule inyō mayrehe ityre rỹdu-ò riwahinyre.

⁵ Tahe inataõna ratòbòna riraynyre. Ixyby inataõna aõni rybe-ò raholare: —Mana ini itxeremy. Tai retehere. Awaru lybymy rabire, ityre rỹdu urihina-di tebò-ki. ⁶ Tahe aõniy-ribi rybeõ-ò raholare: —Womati nieru sohoji-di heka urihina sohojile heka trigo rawykre, txusohoji aõmysỹdỹña òwy wahe. Tule inataõ urihina sevada rawykre, txusohoji aõmysỹdỹña òwy. Uritere ta uva-ò, adỹỹ-ò aõhe isỹdỹỹõmykre.

⁷ Tahe inaubiòwana ratòbòna riraynyre, Bu-doeni riòre wahe. Ixyby inataõna aõni rybe-ò raholare: —Mana ini itxeremy. ⁸ Tai retehere. Awaru bisamadòbòlỹre wesemy rabire. Ityre-ki rỹdu heka Rubu inire, heòty bedè rubunana ihe-ludumy. Inyõ ityre rỹdu-ò ruru riwahinyre. Tai ròhònyre iny rirubunykremy. Inaubiòwa iny-ribi heka, sohoji rirubunykremy. Wou-ki, rama de-semy, rubutyhy-di, iròdu debure-di heka iny rurure.

⁹ Tahe iruyrena ratòbòna riraynyre. Tahe Xiwena wahedỹña rawo-ki iny mahãdu rabire Deuxu rybe òraru-ki, tatyhydỹña òraru-ki rururenyre mahãdu wahe. ¹⁰ Tiiboho rirajuamyhỹre: —Deuxu Inynyrỹhỹkỹ, kai tyhy tate, òbiti tule. Tiu wexi waòwyreny bilidikre, warubudỹdureny-ò? ¹¹ Tahe iximynamynamy tyyurahakỹ-di rexitynyrenyrene. Tahe tamyreny rarybere urihimyò rexielehynyrenykre. Ijoiireny iwesereny rurukreu riraòrenykre. Isòwereny rexihureu wahe.

¹² Tahe debò sohoji reuròna ratòbòna riraynyre. Kiata idi suu ramytypare inihikỹmy. Txuu urile rurunyre, ahãdu isòmy relere, halubusò wese.

¹³ Taina tahe sutxi dejujude iwese bederaty yhydebore ritxiwimyhÿre wese. ¹⁴ Biu titxibo ikõre, iwese tyyriti rarasemyhÿre wese. Ibutumy hãwãlò bedebute tule taherina-ribi ratare. ¹⁵ Iu tahe ibutumy iny rexiwore hãloohokÿwo-ò, manahakÿ hewo-ò tule. Tii roire Iòlò mahãdu, bededinodu mahãdu, soldado dinodu mahãdu, ityhy mahãdu irurutere mahãdu, ibutumy ijõ mahãdu rexiwore. ¹⁶ Tahe taixiwotena-ribi rirajuamyhÿrenyre: — Watxireny mana heka bedesede rynana-ki rÿdu lau rekexiwòrenykemy. Budoeni riõre debure lau tule. ¹⁷ Deburena txu, kyarana txu heka reare tamy, mobo riijekre.

7

¹ Idi tahe inaubiòwa ÿjumy heka tuu rabire. Tiiboho heka inaubiòwa bedehitxihitxi bedemy rÿire. Tahe rimyrenyre yhyhykÿ tebò-ki heka rimyrenyre. Tiu heka òwòru radeõ raykÿhyky roire. Bede-ki aõkõ, aho-ki aõkõ rebònyra? ²⁻³ Tule ijõmy rabire ÿjuõmy ibryra-ribi rarerimy. Deuxu irumy nonadu hãletena nihikÿ widÿÿna heka diwymy idi nade. Iribi tahe inaubiòwa ÿju-ò tii ryryre: —Txiokre inihe. Iwotõmodÿÿõmyke wa suu, bee, òwòru. (Kia ÿju mahãdu dori, bede, bero, wotõmodÿÿdu mahãdu ihÿre.) Bi-raòriõreke heka Deuxu hãletena deòdu òru-ò aritidikre. ⁴⁻⁸ Tiwesebo kia ritidÿÿna rimymy idi rare. Tahe raholare heka jiarÿ tiweserebo. Ta 144.000 iny ibutumy. Israeli ijoi waòinatxi reurò kia ijoimy heka ixidee rimyre. Sohoji sohoji ijoi-ribi 12.000 inymy heka rimyre: Juda ijoi-ribi, Gade ijoi-ribi, Asser ijoi-ribi, Naftali ijoi-ribi, Manases ijoi-ribi,

Simeaõ ijoi-ribi, Levi ijoi-ribi, Issacar ijoi-ribi, Zebulõ ijoi-ribi, Jyje ijoi-ribi, Benjami ijoi-ribi, Kia ibutu ijoi-ribi heka 12000 inymy rimyre.

⁹ Iribi tahe sōwemy inymy rabire. Timy heka idi wariramahāduōkre. Ibutu 12.000 hāwā hāwā-ribi wirotyre. Bede ibutu rybe wixira wixira rybedu ibutu ijoi wixira wahe. Tai tahe Budoeniube-ò tiiboho rotamanyrenyre. Budoeniko-txi ryanako-txi wirotyre. Ibutumy tiiboho ityyurahakỹlemy roiremy. Horeni iru-di heka roiremyhỹ. ¹⁰ Tahe ryrerenyre –irariemy ryrerenyre: –Biu-ò hena waDeuxu-ribi nade rynana nihikỹ-ki ronyreri. Tule Budoeni-ribi nade. ¹¹⁻¹² Tahe ŷju ibutumy heka widotyde ryanawerora-ò, tule matuari mahādu tule iwo-ki. Inaubiōwa aōni ibutumy reserenyre rynana nihikỹko-txi resere taōsana sutxi ritidimy Deuxu kia wowydynamy relere. Kie, myheka rarybere: –Wowydyna, Bedeerydỹna, deālana, loosona, aruru, aixiòlòdỹna. Ibutumy heka kia kanakre inyDeuxu-ò. Rarehykyle, rarehykyle heka rarekre. Kie. ¹³ Tahe wawiò inaubiōwa matuari mahāduō wadee rỹraxire: –Kai aōbo teerymahāte kia tykyurahakỹ-di ratxirenyreriō, tule tiribibo ròireri? ¹⁴ Tahe rarybere: –Aōkōre wanyrỹ, reerykōre. Bedelyyke wako. Tahe wako tuu delyyde. Kia heka dòhònyde heka aōhòkymy dỹnana-ribi dòhònyde rare. Ityky rityranyre heka Budoeni riøre hālubu-di. ¹⁵ Taiki heka rynana nihikỹko-ki ratxirenyreri Deuxuko-ki. Kaheka ruu, txuu-wana heka rāāhimy ratximyhỹrenyre taheto bededỹnana-ki. Kia rynana-ki rỹdu tahe riyrubunyrenykre.

16 Tiu rama rirubudỹỹrenyõmy heka bemomo boho. Tiu txutòteehekỹ-wana wirisỹnyõtyhy ybòtò boho-wana, txutyeh boho-wana. 17 Budoeni riòre dori rynana nihikỹko-ki ratximyhỹre. Tii heka aryỹna adee riwahinymyhỹkre. Tii heka adi itxeredukre heka aradykre heka Umyituedeõna ube-ò. Deuxu irube rirubudỹỹnykre.

8

1 Budoeni riòre debò inatxi reurò hãletenamy ribòhònyreu, aõdee biu-ki roholaõhyre heka byy, myle roire: aõwodỹỹ wodỹỹhomy aõkõ. Wadee meia hora txumy bedemy bede rewyre. 2 Debò inatxi reurò ýjummy tuu rabire Deuxuko-ki nyidemy. Tahe inyõ tamy riõremy idi retehere debò inatxi reurò ajurònamy.

3-4 Tahe iwitxira ýju nade. Tii womati tỹrỹrỹhỹkỹ atara nihikỹ. Tahe xiwenatyre orarade rỹny wihikỹ ritoonyre. Inyõ riwahinyre ýju-dee sõwemy. Riurinykemy Deuxu ijoi ixitòedỹỹna-wana xiwenatyre-ò risõkemy aderòna rỹnyrehekỹ heka womati tỹrỹrỹ xiwenatyre-ki ritxiwire Deuxu rynanako-txi. Ýju iribi tahe kia ibutumy raòwònyre Deuxu-ò. 5 Tahe heòty-di heka ýju atara ritỹxinyra idi heòty-di rehure biu-ribi bede-ò. Tai tahe biumytxi ramytxynihikỹnyre heka suu biu tawe rihetenyre rybe wese wodỹỹ ramytatare.

6 Tahe debò inatxi reurò ýjummy heka rexiywinymy rỹire ajuròna-di jurònykremy.

7 Juhu ýju heka rurònyre. Iribi tahe bedejutytyhykỹ heòty hãlubu-wana raurinymy bede-ò

rejuxunyre. Bedejura tahe roomyhỹ asirade, bedero-wana inataõ-ribi, sohoji roomyhỹ.

⁸⁻⁹ Iribi ihewoludu txurõna-di rurõnyre. Tahe berahakỹ-ò resere hãwãlò nihikỹ wesemy. Tai ibutumy heòtylawò txuramy ituere. Iyre bee tahe hãlubuhukỹlemy relere. Iyre utura tahe ituere.

¹⁰ Tahe ihewoluduhe txurõna-di rurõnyre. Iribi tahe tainahakỹõ berohokỹyre-txi resere berayre-txi tule. ¹¹ Tainahakỹ heka ihyre inire. Tahe sõwemy iny ituere ihyre bee riurinyreki.

¹² Tahe ihewotyhy tyaludu txurõna-di rurõnyre. Tahe aõwesele txutyemy txuu roosòõhyre. Tahe ahãdu tawekremy turutyhy inihe relere taina tule. Tahe bederurunytyhyre heka.

¹³ Tahe idi retehemy jiarỹ rãiwãhã. Tahe tuu rabire nawii nihikỹõ ruòmy ratxireriõ. Tii iryru-di heka rarybemyhỹ: –Bede heka rabinakre. Bede heka rabinakre. Suludu bede iny-ò ryrymyhỹ: –Txioinihe sõwemy aõbina binahakỹ rexiòtỹmyranykre. Tahe hewotyhyludu ýju txurõna-di kudurõnykreu heka bede rabinatyhykre.

9

¹ Ijõ ýju tajurõna rurõnyre. Tii heka iruyre hewoludu rare. Tahe ijõ inymy rabire. Biu-ribi suò taina resere wese tii resere. Tamy ijò raynaõ diwahinyde, hãloo nihikỹ ratòbòna rayna wahe. Hãloo nihikỹ heka irehehekỹ rare. ² Tahe riraynyre. Wàdasi iribi tahe dòhònyde. Iwese tahe bede rurunyre wawerorareny-di. Txuu, ibutumy rurunyre wàdasi lybyhykỹ òraru-ki. ³ Tahe seihikỹlyby wese heka wàdày-ribi dòhònyde tahe desede suò. Seihe heka ityibòròhòkỹ wese

heka ihe rare. ⁴ Asi rubudỹỹõmykre bederaradeõ tule, òwòru tule. Inyõ Deuxu kia ritidyỹna iòru-ki rỹiòkeki, tahe tule tamy ijira rỹikre. ⁵ Iny rubudỹỹmy aõkõre. Tahe iny aõhõkỹmy rotỹỹnykemyre heka iruyre ahådumy. Aõhõkỹmy rotỹỹnymyhỹre kia ihe juberereri riijererimy ihỹre. ⁶ Kia txuu tahe ixirubudỹỹmy reamyhỹre. Tahe aõkõre heka timyhe ixirubudỹỹkõmy tamyhe rubu dehemynyõhyymyhỹde. Tukemy heka riwisỹnymyhỹre. Tahe aõkõre rubu iribi rahenymyhỹre. ⁷ Seihikỹ heka awaru wese rare. Iwese awaru rexiywinymy wou-ki ralòkremy rỹimyhỹre wese heka rare. Irati-ki rỹire womati tỹrỹyhỹkỹle irataana wahe. Iòsana heka iny òsana wese rare. ⁸ Irade irehehekỹre hãwyy radehekỹ wesele. Txuu tahe leaõ juhukỹ wesele rare. ⁹ Wyhy itxena ibreti-ki roimyhỹre. Womatile ibreti rare. Bede heka urile rawodỹỹnyhỹkỹmyhỹre. Iwese tewe awaru-di nodu sõwe iwodỹỹ rare. Iwese aõbina-ò raijaramyhỹre wodỹỹ wese wahe. ¹⁰ Seihikỹ heka bòròhywe nihikỹ wese heka rare. Tahe iruru-di rare. Iny riwotõmonymyhỹkemy iruyre ahådumyhỹmy. Iherona ramytxytxyire iruyre ahådumyhỹmy. ¹¹ Iiòlò heka hãloo rahejihikỹ wedu heka rare. Ini heka hebreu rybe, Abadu rare. Grego rybe heka, Apoliõ heka rare. Iny rybe heka iny hàdu hàduhukỹ rare.

¹² Juhuu bedebinahakỹ ituera ròhònrya. Katahe ijò iwitxira kòdòhònrykre inatximyhỹmy wahe.

¹³ Ijò ÿju tajuròna-di rurònrye. Tii heka debò sohoji hewoludu rare. Raholare heka rybeõ-ò.

Womati xiwenaò-ribi ròhònyre. Xiwena-ò heka inaubiòwa sòwe. Kia womati tỳrỳrỳ xiwena heka Deuxu ryanako rỳire. ¹⁴ Kia ýju-ò heka rarybere ijuròna dinodu wahe: –Inaubiòwa ýju besedỳnyke ixinamy ròhònyke. Tii heka Bero nihikỳ ròtena-ki, bero Eufratesi-ki. ¹⁵ Tii heka ròtena-ki ratximyhỳre kia bededỳnnanau, kia txuu, kia ahãduu kia beòrau. Iribi tahe riòlòdỳnyrenyire. Iribi tahe ihewoludu iny ibutumy rahure. Iyreyre inataò hãwã jurajuramy heka rahure. Inataò jura-ribi sohoji sohoji rirubunyire. ¹⁶ Tahe jiarỳ raholare tiweserebo aòbinadumy rỳire. Iny 200.000.000 inymy rỳire. ¹⁷ Tahe aòbinadumy rabira awaru tyre ronyreri. Awaru tyre ludu tahe iwyhy itxena dire. Ibutumy wako-ki rỳire. Ibutumy rabire. Womatihikỳle, heòtyhykỳwesele heka rare. Ijò heka tỳreura rare safira wese. Ijò tahe tỳre raramadòbò wesele. Awaru rati heka leaò ratihikỳ wesele rare. Heòtyle iry-ribi ròhònyreri wàdàsi enxofre-wana wahe. ¹⁸ Kia heòty heka inataò jura-ribi sohoji jura iny rahure. ¹⁹ Tule awaru nohewòru heka iruru dire. Iryribile tahe iheòty ròhònyre. Taile iruru rare. Hemylala rati wese dire ruròmý heka inatxi hemylala juwesele. ²⁰ Iny ituere sỳtybymy tahe rarònyre. Deuxu deàlana dee heka reòbyòhyyre. Diabo mahãdu luulemy ratximyhỳrenyire. Aõma rityhynyrenyire womati tỳrỳrỳhỳkỳ ritxoo, òwòru ritxoo suritxoo, mana ritxoo. Kia ritxoo heka aõki robiòhyymyhỳre, aõ roholaòhyymyhỳre. Rariaòhyymyhỳre. ²¹ Iòraru-ribi roxirãhiòtyhy iribi tahe rahòtinyrenyire aõ òtaòtamy, rubudỳnyamy, wasinamy, òwòrumy. Kiale ròhòtinyhyrenyire.

10

¹ Tahe iwitxira ŷjuhukŷ rabira biu-ribi suò robehererimy. Biuwetykywesehekŷle iweroramy rŷireri. Tahe owaji wese iratikile roireri. Iòsŷny tahe txuwewehekŷle, iwaube tasŷ heòtyhykŷwesele roosòm. ² Tii heka tyyritinadile debò ritŷtenymy ratximyhŷ. Tahe itŷte heka deboube-ki roimyhŷre. Tahe tawaube ruruludu heka betye ritidimy idi rŷire. Tawahyweludu tasŷ ityti-ò ridemy idi rŷire. ³ Tii ryryre heka tarurumy. Leaò iràhàkŷwesele ryryre. Iu tii rarybereu, debò inatxi reuròm y heka ramytxynymy dirawyònyde. ⁴ Tahe riritinyre heka aòmbo timykira raryberenyre wahe. Tahe rybeò-ò raholare: —Kia widŷŷòm. Kia rybe hewa ierysyna aòkò rare ixinamy tahe tuu roike. Biritinyòke aòmbo ramytxyna rarybere? ⁵ Tahe ŷju suki ratxireri, beki ratxireri ruru ludu debò biu-ò riteòsinyre: ⁶ —Deuxu-ribi heka tuu raryberé, warybemy inatyhymy. Deuxu heka tiemy rarehyyle rare. Ibutumy heka riwinyre biu-ki rŷira bede-ki rŷira-wana. Tai heka warybe inatyhymy rare. Ararybekre heka raroorehenyòtyhy kaki. ⁷ Debò inatxi reuròna ŷju tajuròna ritxurònykreu heka, Deuxu ibutumy relemy rŷikre iwese rarybere wese. ⁸ Iribi tahe rybe biu-ribi wadee nade. Wadee rarybere: —Biòryke hewa tyyritina ŷjudebò-ki naderí suki bera-ki kia rŷireri. ⁹ Tai tahe tamy rehemynyre. Tahe wadee rarybere: —Biwyke. Birŷsŷke. Juhuu tahe bidi wesemy ary-ò bidekre. Birŷsŷkreu tahe ibutumy rahyrenykre awo-ki. ¹⁰ Iribi rewya rerŷsŷra. Iwese tii juhuu

rarybera wese rare. Ibreere juhuu. Iribi rerÿsÿreu tahe, wawe rubererenyre. ¹¹ Tahe wadee rarybere: —Kai heka dohodÿÿmy makre ixityre ibutumy inywitxiramy heka botohodÿÿkre. Ibutumy inywitxira witxira-my botoho. Ibutumy rybewitxira witxira botohomy. Ibutumy iòlòmÿ botohodÿÿkre.

11

¹ Iribi tahe inyõ wadee diwahinyde urihixinaõ. Wadee rarybere: —Biurihikesÿ titxibo Deuxusÿ rÿimyhÿré. Iwo tule xiwena wahidÿÿna biurihike. Idi mariake tiwesebo iny iwo-ki rÿirémÿ. ² Tahe ahana-ki iube idi riraõmyke. Tii dori ityhydÿÿdukõdu mahãdu dee wahisidÿÿna rare. Tiiboho dori 42 ahãdumy idi rariakre. ³ Jiarÿ dori inatxi rybedu idi watxiwãhãre. Tamy ruru ariwahinykre. Tii heka saumytykyle rariakre. Tii heka rybe ritÿnynykre beõra inataõ weeremy. ⁴ Rybedu inatxi heka bederaty õwòru inatxi wese rare. Tahe tule inatxi loosõna mynydu wese heka rare. Kia Deuxuko-txi rÿire wese heka rare. ⁵ Inyõ idi ibinamy riwisÿnykeki, tahe ixirubudÿÿmy rorukumyhÿre. Heòty iryribihikÿle ròhònyke heka iny rirubunyke. ⁶ Tii heka irurudire biu dejuxu lau riekemy. Tahe tiu biu reseòtyhy heka inataõ beõra weeremy wahe tii Deuxu rybemy rarybereriu wahe. Ihãre tahe tii rexirahòreke bero nihikÿmy aho nihikÿmy hãlubumy rexirahòreke. Ihãre tahe ibutudee bina riwahinyke, rubuna riwahinyke tiiboho awimÿ tai raharenykeki. ⁷ Kia heka inataõ beõra weere rikonananykeu, rybe tÿnydÿÿdu inatxi

rikonananykeu, hāloo rehe nihikỹwo-ribi aōni kòdòhònkykreu, tahe aōbina nihikỹ-ki heka iu rỹikre. Tahe inatxi rybedu rirubunykre. ⁸ Iumy rubu tahe hāwāry-ki roikre, tibo inyrỹ rirubunyrele. Rawesenanyre, kia hāwā arinikre Sòdòma ada Egito wese. ⁹ Inataō txuu weere riwydi hāwā ube-ki iumy rubu roikre. Inyō heka tiu rituunyōtyhy. Ibutu iny hāwā hāwā-ribi ibutu rybe wixira-ribi heka tamy itxeremy rehemynykre. ¹⁰ Ibutumy heka iny teysamy rỹikre urile iny widee aōna aōnamy riwahinymyhỹkre. Tiiemy inyō raaōmysỹdỹōtyhy kiatxuu. Tai heka tahōti heka itxi reakre kia inatxi rybedu rurure tahōti itxi reakre. Lisini heka rỹikre, worana bedehesi. ¹¹ Kia txu inataō txuweere-di, iumyreny iruna kòdòðekre tamy Deuxu-ribi. Tiiboho lamamy rotamanykre. Iny rarokonykre heka ruberu nihikỹmy rỹikre heka. ¹² Inatxi rybedu-ò heka rybetereō biu-ribi nade: –Kaiboho bòdòibedenyke kaò. Tahe biuwetyky raòwònnyrenykre kia iòludu mahādu idi retehemy rỹireri yrubule. ¹³ Kiaule tahe bede ramytatakre. Debò wiò heto jura jura-ribi heka sohoji resere. Tahe 7000 inymy rurure. Tahe iny rarokonykre tahe iuhe ruberu nihikỹmy rỹikre. Tahe wowydyna riwahinykre Deuxu biu-ki ratximyhỹrèò.

¹⁴ Inatxina bede dỹñnana bina tahe ròhònnyre. Tahe ijō kanakre.

¹⁵ Debò inatxi reurò ÿjummy heka juròna rurònnyre. Tahe sōwemyhe iny rarybemy rỹimyhỹ, ryrymy rỹimyhỹ: –Kia bede dỹñnana, iòlòna, inynyrỹ hōrō rare. Kristu hōrō rare. Aōu aōu tii ibutu ibutu iòlòmny ronykre. ¹⁶ Wawiò inaubiòwa matuari

tahe, rynana-ki ronyrenyneri Deuxuko-txi. Tahe Deuxuko-txi reserenyre. Wowydyna tamy riwahinyrenyre:

¹⁷ –Kai Deuxu, tuu tate ihyymy, ibutururu ratyre aruru rare. Aruruteremy bonykre beded dinodumy. Umy reàlàmy kia-ò.

¹⁸ Iny heka ibutumy alau ruberumyhÿre ibutumy òludumy rÿire, adee deburemy rÿimyhÿre. Rubu hitxidÿÿna heka bede reamy heka roire. Eòdurenyle heka riòwynykre, aijoi riòwynykre, rybedu mahādu wahe. Ibutumy ani rityhynomy rÿira, nihikÿ iyja-wana, kia bede huduhukÿ rare. Ibededÿÿnana reamy heka roire.

¹⁹ Biuwetyy riraynyre Deuxu heto. Ibutumy heka lobidÿÿna tyyriti hyna iwo-ò iny robimy rÿire. Iu tahe biumytxi, biudelaa ibutu yhynihikÿ, ibutumy bede ramytatamy rÿire, berahakÿ tule resere.

12

¹ Iribi tahe ròhònyre warasina-ki aõbo. Aõhebo bede ritÿÿnykremy, biuwetyy-ribi hāwyyõmy ra-bire. Txuu wese tahe itykyra. Tii lamamy rÿire ahādu tyre. Tarati tyre-ki tahe tainahakÿ rataana idi rÿire, waòinatxi taina wahe. ² Tii heka bòtòmy ihÿmyhÿ. Ryrymy heka txubrere riijemy tabed-edÿÿnana-ò resera uladu reakremy. ³ Iribi tahe aõna aõna biu-ki rexisÿnymy, aõni hemylalasò nihikÿ wese wahe. Irati tahe debò inatxi reurò sōwe iratimy. Debòwiò sōwe heka iòm. Irataana heka iratimyna myna rÿimyhÿre. ⁴ Tii tahe tōhewòru-di taina ributunomy ridyre. Bede tyre-ki idi rehure,

taina jurãð. Tii hãwyyko-txi rỹire. Uladu reakreule tahe uladu riròkremy. ⁵ Tahe tohouã reare, hãbumy heka reare. Tii iòlòmý heka ronykre, ibutu bede bede iòlòteremy wahe. Ihãre tahe Deuxu ridyre. Raðwònýre heka Deuxu rynana-ò. ⁶ Hãwyy tahe rahenyre bederahy-ò. Tii 1260 txumy heka tii bederahy-ki bede riekremy. Deuxule heka tii riywinyre.

⁷ Biu-ki heka aõbina nihikỹ rỹire. Mieli, ýju dinodu heka, tajoi-wana raaõbinanyre aõni-wana tajoi-wana. ⁸ Aõni tahe resera tajoi-wana. Ròtara. Biu-ribi ròhònykemy tahe idi ratxireri. ⁹ Riteònyre biu-ribi, aõni nihikỹ heka ròhònýra. Tii heka hemylala nihikỹ wese rare. Satanasi inire, Diabo wahe. Itxenadỹýdu heka rare ibutumy iny. Suki resera, tajoi-wana. ¹⁰ Raholare tahe biu-ribi rybeõ-ò: —Deuxu tarasana heka rehemynyre. Tii taruru riteòsinyre iòlòtyhy raremy. Kristu taruru riteòsinyre. Aõbina bina rybedu tahe Deuxu-ò rarybehymy ratxireri, txu-wana, ruwana. Tii tahe ròhònýra biu-ribi. ¹¹ Waityhydỹýdu seriòre mahãdu heka ròtara Budoeni hãlubu-di, inatyhyna hãletena-wana. Rurukemy ratxireri tiiboho tamydeewikeki. ¹² Beysabenyke biu mahãdu. Koityhyxe tahe ahohokỹ, bede-wana. Diabo dori adee rehemynyre. Tii reburere, ibededỹýnana dori iòhòmý reare.

¹³ Iu hemylala aõni heka bedekile ratxirerimy riryreyre, tahe hãwyy tohouã-wana kia-ò aõhòkỹmy rotỹýnkemy risỹnykemy idi ratxireri. ¹⁴ Tahe hãwyy heka nawiihikỹ-ribi idei rihuòtera, tahe idi ruòra bederahy-ò, tasỹ-ò. ¹⁵ Hemylala aõni

tahe bee sōwemy tary-ribi rarybexinyre hāwyy ribòròbòròdỹkemy. ¹⁶ Tahe aòkõre. Suu tary riraynyre tahe ibutumy bee riõre. ¹⁷ Hemylala aõni tahe reburemy reare hāwyy dee. Ibutumy hāwyy ijoi mahādu rirubunykemy idi ratxireri. Kia mahādu tahe Deuxu bedede ywina rityhinyre, iwese Jesuisi tuu ritỹninyre wese. ¹⁸ Tai hemylala aõni ŷnyrakile rỹire.

13

¹ Iribi tahe aõnimy rabire berawo-ribi ròhònyre warasina-ki. Tii heka debò inatxi reurò iratimy tahe debò wiò iòm̃y ijõdire. Rataanaõ tahe sohoji sohoji iò-ki rỹire. Irati-ki tahe nibinamy heka rỹire. ² Tii heka hālòe wesetyhymy rare. Iwa heka ursowa wesele heka rare. Iry heka hālòery wese rare. Aõni heka tamy ruru sōwemy riwahinyre, irynana wahe. ³ Iribi heka rabire iratiõ, sohoji heka wotõmonahakỹ dire. Tahe reytereri. Ibutumy iny riòtiinyre. Aõni riheludunyre. ⁴ Aõni hemylala heka taruru riwahinyre aõni-ò. Tai tahe ibutmy iny heka aõni riwowydunyre. Iny rarybere: —Mobo heka aõni wese rare? Mobo ijesedukre? ⁵ Aõni heka aõbina bina rarybere. Inyõ ribyrenyõtyhy. Ahādu 42 tii heka kiawesemy rỹikre. ⁶ Tii Deuxu dee heka aõbinamy rarybere, Deususỹ dee, ibutumy biuludu mahādu tule rybebina-di ribinabinadỹnyre. ⁷ Inyõ tamy ruru sōwemy riwahinyre Deuxu ijoi mahādu-wana raaõbinadỹkemy. Tuu rahaỹnanykemy heka ibutumy iny witxira witxira, ibutumy rybe witxira mahādu, ibutumy bedede bedede mahādu. ⁸ Ibutumy

iny ityhydỹỹdukõdu mahãdu tamy wowydyna riwahnya. Budoeni Riòre ijoi mahãdu tahe aõkõre, kia dori ini rỹirenyre tyyriti-ki. Juhu bededyỹnana inireny iwo-ki roire. ⁹ Tahe inyõ roholakeki heka, boholake. ¹⁰ Inyõ ridyke. Riròtenyke ròtenawo-ki. Ijõ tahe rirubunyke. Deuxu ijoi mahãdu tahe rexityhynykre idi òbitimy roirenyrekremy. Kie.

¹¹ Tahe ijõ aõnimy rabira. Tii ròtuòreri bede-ribi. Iò heka inatxire. Budoeni wese heka rare. Ihãre tahe aõni wesele rarybere. ¹² Tii juhu aõni wese rare, iruru. Rarybere: –Juhuludu aõni biwowydynyke. Kia ratiwotomona-di. ¹³ Budoeni aõni heka aõna aõna wiwihikỹmy riwinyre. Tii heòty biu-ribi resekemy tii rotỹỹnyre. Ibutumy iny tuu robire. ¹⁴ Tii ibutumy iny riitxenanyre kia aõna aõna wiwihikỹ òraruki. Iny ibutu-ò rarybere: –Suritxooõ nihikỹ biwinyke aõni dee. Tii mayrehe-di rawotõmore hãrele ruruõre. ¹⁵ Tahe ihewoludu aõni heka rabunya suritxoo-ò tahe irumy rỹire. Idi suritxoo rarybere. Inyõ tamy wowydyna riwahnyakeki, tii tahe rirubunyre. ¹⁶ Tii rarybera ibutumy iny-ò: –Kaiboho waritina bitidike aòru-txi, eboreny-txi, ruruweludu wahe. ¹⁷ Aõkõkeki tahe aõhoho aõkõ riwyke. Iny kia ritina ijõdiõkeki aõhoho aõkõ rohonykre. ¹⁸ Kai erydỹỹna sõwekekile, aõhebo tatỹỹnytemy kaiboho bierybenykre. Kai erydỹỹnadikeki, aõni heka rieryke. Ini heka iritina raròsòna wese rare 666 ihỹre.

14

¹ Idi tahe budoenimy rabire lamamy nyidemy Jerusalẽ hãwã-ki. Aõma Siaõ hãwãlòkile rỹiremy.

Tii-wana heka rÿire 144.000 kia inymy heka tii-wana rÿire. Ibutumy tiiboho heka tybynimy, inymy heka ibutumy iòru-ki raritinymy rÿire ibutu òru-ki. Tahe tuu rabire rasinaõmy. ² Biuwodÿÿ nihikÿmy raholare, tule biuwodÿÿhÿkÿ ada benihikÿ lesetere wese iwodÿÿ rare. Tahe sõwemy iny rawiunymy rare violaõ-wana, kia wodÿÿ wesehekÿle wahe. ³ Kia heka wiu tÿmyra riryrymy ròirenyre kia iny tÿmyra rirahura mahãdu. Kia Deuxu rynana nihikÿko-txi heka rotÿmynyrenyra. Kia inaubiòwa aõnityhy heka waitue inaubiòwa matuarimy tahe ijõmy rÿire. Tahe 144.000 kia inyle heka rawiunykeki, awimy rÿike. Tii dori aõma tarasadumy ratximyhÿrenyre. ⁴ Tiiboho heka tyra roire, tiiboho heka òbiti roire iwese ijadõma ratxirerimy ihÿre wese òtadu mahãdu aõkõhyyre. Tahe bu-doeni riòrehemy heka rare titxibo tii rare hemy. Tii dori wydynamy rare. Kia hãbuy-ribi. Bede ywisidÿÿna juradÿÿna kia dinodumy heka rare. Deuxu heka Budoeni Riòre-wana wahidÿÿnamy heka roiremy. ⁵ Tiiboho heka raryberenyõtyhy tiiboho ruidu roiremy. Òbiti heka tiiboho roire. Tiiboho heka rahitxirenyre Deuxu dee.

⁶ Tasÿ ijõmy rabire ÿjuõmy aõma biuwetyky kiko-txi raramy ruõmy rabirerimy. Tii heka Rybewihikÿ tÿmyra rimymy idi rara aõ inywitxira-ò ritÿnynykremy. Ibutu bede bede inywitxira-ò ritÿnynykremy. Ibutu rybe-di ritÿnynykremy, Rybewihikÿ tÿmyra wahe. ⁷ Kiamy heka ryryre: — Deuxu bityhynyke. Marybebenyke tii awi raremy nihikÿ raremy. Bededÿÿnana rehemynymy roire ihitxidÿÿdu bede-ò. Bityhynybenyke tii dori bede

ibutumy riwinyre bee, biu ibutumy riwinyre.

⁸ Tahe ŷjuō heka ihewomy ruòmy ratximyhÿre. Babilonia hāwā nihikÿ rexihura. Ibutu iny dori òraruna-txi resera. Kia hāwā mahādu dori ibutumy iòrarudÿÿnyra.

⁹ Iribi tasÿ iwitxira ŷjusÿ tamy nade iheto-ò. Tii tahe ryrymy nade: –Inyō aōnimy ada iritxoomy rityhynykeki, iribi riwykeki iwotōmona iòru-ribi tebò-ribi riwykeki iritidÿÿna, tii tahe Deuxu ykarana heka iribi riwykre. ¹⁰⁻¹¹ Tiibohe heka aōhōkÿmy rotÿÿnyrenykre ŷjuko-txi. Budoeni Riòreko-txi aōhōkÿmy rotÿÿnyrenykre. Heòty kia bede dÿÿnana tyhy tiemy raòwònyhy rarakre. Tiibohe dori tiemy aōnityhy nihikÿle, iritxoo-wana rityhynymyhÿrenykeki, tiibohe heka iritidÿÿnale ixi-ki riwymyhÿrenyre. ¹² Tai tahe ibutumy iDeuxuhe ywina-di heka iwitxira iny ronykemy heka ratximyhÿre. Ibutu aō òta ibina bina biòludunybennykemy, tiibohe dori aijoi òbitihy boibekemy ikonana-ò. Jesuisi bityhynykemy.

¹³ Iribi tasÿ ixityre ijō rybe-ò raholare watyre-ki. Rarybere: –Kiahe biritinyke: Aō roorehemy aōkō heka dehemynomy deade. Kia Jesuisi-ò rurure heka uriōno heka tamy dehemynomy deade. Iribi tahe tule rarybere: atyutyby reysamy ratxireri. Myle. Tahe rexielehynomy heka rorukumyhÿrenyre aōhōkÿmy dÿÿnana-ribi. Tii dori aōwiihikÿle riwinyrerimy ihÿre. Reeryre heka.

¹⁴ Idi tahe iwitxiramy aōmybo rabire wiribi hitxiramy. Nonoe wetyky urahakÿle wese heka rare. Inyō ityre-ki rononymhÿ. Hābuō wesehekÿlemy heka rare. Irataanadihikÿlemy

ronomy heka tarati-ki heka idi ronomyhỹ. Womati tỹrỹrỹhỹkỹle wesehekỹle irataana rare. Tahe ijõ heka itieresynaõ-di heka tebòkihikỹle heka rỹire. ¹⁵ Ijõ heka Deususỹ-ribi nade, ýjuõ. Tamyhe ryryre: –Bexitỹmyranyke, itieresyna-di tasỹ bexitỹmyranykre. Bededỹynana rehemynomy roire adee aõ biòròròkemy. ¹⁶ Tahe kia nonoe wetyky tyre-ki ronyreri tahe rexidelenyre riòròrerihe. Riwyrehe ibutumyhe aõna aõna riwyre tahe ributunyre.

¹⁷ Kia ijõ Deususỹ-ki ratxireri tasỹ tule debònadimy ratximyhỹ kia tieresynadile ratxireri. ¹⁸⁻¹⁹ Kia ýju aõma heòty kia loo-di ratxireri tahe dyryde heka tieresynadile tamy rehemynykemy. Tieresynadile biorobeke idi atxibeke. Ibutumyhe bede bede kia biorobeke. Ceifale dori biorobeke. Rubumy dori rỹire hitxidỹyna-ò. Iribi tahe reare. Tiò tiò idi reamy tahyna-ò rabutumy reare kia Deuxu ykarana-ò. ²⁰ Tai tahe bederatyhe risorunyre nyre hãwã-ribi hitximy. Sõwemy hãlubu ròhònyre. Kia urihixina heka sohoji metro weere heka rare. Irehere heka bero wese 300 quilometros irehemy. Awarulomy heka rabeheõmy roire ibero.

15

¹ Ijõ aõna aõnamy rabire biu-ki ihewo-ribi riteòsinyreri. Debò inatxi reuròmy ýjumy heka rimyra kaa aõmysỹdỹyna. Kidiwydenykre heka debò inatxi reurò aõhòkỹmy dỹynanamy. Idi tahe Deuxu ykaranamy rexikonanamyhe roikre.

² Iribi tahe bero nihikỹmy rabire wako-txi aõma heòty wese, womati tỹrỹrỹ wese. Sõwemy heka

inymy rabire kia sutyre-ki nyidemy bero iòhòmý. Ibutumy heka aõni debure debureheký kia rubu-ribi ritamy nyide. Iu heka aõni tai roiõhykyre heka, aritidýyna roiõhykyre heka. Tahe aõma aõnimy rahaýnanyrenymy ratximyhýre iritxoomy tule violaõ oworuwodýkýhe tai rýire, Deuxu rawiunyrenyreri riryryreri. ³ Moisesi Inynyrý deòdu wiu riryryreri. Tule Budoeni Rìre wiu riryryreri. Kiamy heka rare: –Oi Deuxu, Kai heka aruru-di tate. Aõni tewinymahãte. Ibutu tarasana tewinymahãte. Ibutu heka ary òbiti rare. Awi heka rare. Kai heka ibutu iòlò tate. ⁴ Iòlòhyky tanamahãte. Tiiemy heka rityhynymy hyky hyky tanamahãte Inynyrýbohomy. Wowydyna heka adee riwahinymahãke. Kai sohojile heka òbitityhymy atximahãte. Ibutu bedede bedede ludu heka anatyhynykremy kedeakre. Ibutumy aõbo tewinyte. Ibutumy bedede òbitidýynymahãte heka rierye.

⁵ Kia bedeo heka Deuxu hetomy roimyhýre ierykõnamy roimyhýre. Iwòte ierykõna. Tii heka riraynyrenyre heka kia bede. ⁶ Kia debò inatxi reurò kia ýjuhe ròhònyre Deuxu heto-ribi. Diwydehe debò inatxi reurò aõhòkýmy dýýnana. Aõma itykyrenyre, linho urahaký itykyrenyre. Irawo-dí ibreti wereysanamy tahe womati týrýrýhýký reare. ⁷ Sohoji aõniõ aõma Deuxu ykarana hyna sohoji sohoji-ò tamy diwahinyde. ⁸ Deuxu hetowo heka aõma wàdàhàkýlemy reare. Loosòna dori iruru dori sòwemy rýimyhý. Tai heka urile roosòhòkýmy ratýrýrýhýkýmy. Inyõ heka iròteõna. Debò inatxi reurò ýjumy. Kia ritxiwimy

rexihudile tahe iny ralòke.

16

¹ Deuxu hetowo-ribi ijõmy raholare rybetereõ-ò. Rarybereri ýju mahãdu-ò: Boibenyke hewa abede-ò. Debò inatxi reurò hyna bitxiwibenyke kia Deuxu ykarana hynamy. Tahe ýjumy dòhònymy deade tahyna-di ditxiwide bede-ò.

² Iribi tahe rexidelenymy reare aõma juhoo ýju ihyna ritxiwire bede-ò. Ýju binahakýmy ròhònyre ibutu inymyhe robýtýmy reare. Kia aõma aõni kia ritina iòru-ki rýirele kýnyhe tuu rýximy. Tule suritxoo rityhynymyhýrele kia mahãdule heka yjy yjy ròhònyre.

³ Tahe ihewoludu heka tahyna-di dòhònymy deade. Betyre ritxiwire. Bee hãlubu hukýlemy reare. Ibutumy bera-ki raremyhýre ituere.

⁴ Juhu ludu hewoludu tahe ritxiwire bero-hoký tyre heka ritxiwire. Bee ibutumy bewydysyna rihòrònyre. Ibutumy hãlubu hukýlemy relere. ⁵ Tahe ýju rybe raholare aõhebo bera-ki rotýnyrerìò: —Kai Deuxu, Kai awi tate. Kai òbiti tate. Tuhyy ahãte ihãre tahe tuhyy ahãte. ⁶ Rybe týnydýýdu mahãdu heka ituere, rurure. Deuxu ijoi hãlubu ritxiwire suò. Katahe rubudýýdu kaihe iòwydýýdukre. Hãlubu tetxiwiteriki tule iòwydýýdukre. ⁷ Tahe raholare ijõ ýju rarybereri-ò, Xiwena-ribi heka ròhònymy: —Kia InyDeuxu heka ibutumy ruru dire. Ibutumy tewinyte òbitimy aw-imy.

⁸ Tahe ihewotyhy konana ludu tahe ritxiwire hyna txutyre-ki. Tahe txuu ratòteenyrene itòtee nihikýmy relere. Sõwemy heka iny risõre bedetòtee.

⁹ Tai tahe rirajuamyhÿre Deuxu nibinahakÿmy rirajuarerimy ihÿre Deuxu dori diteònyde heka bededÿÿnana binahakÿ. Tahe inyõ heka tõhõti rawitxiranyõhyyre iraykywydyna. Kiamy ixiwesehyy rõhõtinyrenyire. Kia iny heka aõhe rotÿÿnyõhyyre wowydyna loosõnabo.

¹⁰ Iwixira ÿju tahe aõma ritxiwire tahyna aõni ryna tyre. Kia heka aõni beludu rare. Tarynana tyre rononymhÿ. Tahe ibutu irynanareny torohokÿlemy reare. Ibutu iòlõna torohokÿlemy reare. Tahe tòròtò-ki ruruare taaõhÿkÿhÿkÿnareny-di. ¹¹ Tiiboho heka Deuxu nibinahakÿmy ryryre webinadumy roireki taaõhÿkÿhÿkÿnareny-di. Timy heka rexinohõtilosanyõhyymhÿre aõbina binahakÿ riwinymy roiremyhÿ-ribi.

¹² Tahe iwixira ÿju tahyna ditxiwide. Eufratesi berohokÿ tyre ritxiwire. Tahe ibutumy heka ruÿre. Oriente iòlò mahãdu dee tahe ryy kia riraynyre. ¹³ Tuu rabire heka inataõ tyytyby binahakÿ. Rexitykynyre òrò tykyhykÿ wese rexitykynyre. Aõni heka hemylala aõni inire tahe iry-ribi rexiòlòdÿÿnyrenyire. Tule aõnibina witxirary-ribi, tule aõni rybedubina-ribi. ¹⁴ Iribi heka aõni bina tyytyby kia tyytyby ibutumy heka bede dinodu iòlò ributumy. Raaõbinanykemy heka dirahude Deuxu kia mahãdu-ò. Deuxu ihitxidÿÿnatxumy rÿikemy heka anade tii dori ibutu ratyre aõna aõna-ki. ¹⁵ Kristu rarybere: –Tahe boholabenyke. Aõwesele heka anakre. Wasidu wese my heka adehemynymy adeakre. Ibutumy iny wararòsòdu mahãdu teysamy rÿikre. Atyky heka biywinymahãbenyke tai timyki maixÿrubenyõtyhy

adehemynykreu. ¹⁶ Kristu rarybere: –Ibutumy heka widotyde aõbinakedu Mikidu hãwã-ki wahe. Hebreu rybe-ki tahe Armagedom inire.

¹⁷ Tai tahe ikonanatyhy ýju tahyna ritxiwire yhykile. Tahe raholare biumytxihiký raholare Deususý-ki. Deuxu rynana-ribi dòhònyde: –Ibutumyhe rakonanamy roire. ¹⁸ Tahe biumytxihikýle ibutumy rawodýýnyre. Tule biu relaanyra. Biu ramytataõmyhýre idi tahe ramytatare. Tii heka lahityhy rare. ¹⁹ Tai tahe Babilonia hãwã rabòhòre inataõ jura juramyhýmy. Ibutumy hãwã nihiký-ribi hetohoký rejuxunyre. Tai tahe kia Babilonia kia òraru-txi tahe Deuxu tõhòti reare. Tai tahe aõhòkýmy risýnymyhý ibutumy aõbede binahaký tamy riwahinyre. ²⁰ Bedebute ibutumy rexiwore. Iribi tahe hãwãlò tytyhykýlemy reare bedero wesehekýle. ²¹ Idi inytyre resemyhýre bera ere erewesele resererimy ihýre. Ijõ iutxie tahe 40 quilo bede heka iutxie rare. Kia tahe iny sumy rýire nibinahakýmy Deuxumy rarybemy.

17

¹ Tahe ýju monahyna-ki wadee rybemy nade: –Adee aritýnynykre aõbo Hãwã Bero sòwe aõhebo rotýýnykré heka. Kia hãwã adee ariteòsinykre timybo rare. Wedena wese aõhòkýmy rotýýnykremy. Deuxu heka aõhòkýmy dýýnana riwahinyke kia hãwã-ò. ² Bede iòlò dinodu tamyhe iòraruna tamy rexiòrarunyre. Tule iny bedemy rýira mahãdu ralòre tamy òtaõtamy. ³ Tai ta kia ýju tamy riwadyre bederahy-ò. Deuxu Tyytyby wadee dobehede? (Riwatyytamy watyytyby heka ridyre). Tai tahe tuu rabire

heka hāwyyomy aōma iròdutyre-ki ronyrerimy. Iròdu heka isòhòkỹlemy roire. Debò inatxi reurò irati rỹire, tahe iò debò ituemy sōwe. Iritina heka aōkōre rarỹỹnomyhỹre. Deuxudee heka aōbina binahakỹlemy tai iritidỹỹna rỹimyhỹre. ⁴ Hāwyy heka isòhòkỹ ityky rare, iwihikỹ rare. Ityky tyre heka womati tỹrỹhỹkỹ roire. Mana rỹsỹ wiihikỹ, woumana-wana. Bemona debò-ki idi rare. Iwo-ki tahe bemonawo-ki tahe aōna bina nibina tai roire. ⁵ Tai tasỹ iōru-ki tule rỹire iniō. Aōbo rare tahe iny rieryōtyhy. Babilonia Nihikỹ rare. Ibutu wedenase tii rare. Ibutu inybinase tii rare. Kia luunadu ibutumy bede bede-ki. ⁶ Iribi tahe rabire hāwyy ixityre. Tii iny hālubu riōre. Ityhydỹỹdu mahādu hālubu-di rexiòdewàrinomy heka rare. Tiiboho rurure, òbitimy Jesusimy rityhynyreki wahe. Kia hāwyyomy tahe rabireu, rexiòtiidỹỹnyre. ⁷ Tai tahe ŷju wadee rarybera: —Aōherekibo bede teòtiinomy tỹite. Adee arelyykre aōbo rare —kia hāwyy iròdu-wana, aritỹnynykre tiiboho aōbo raré. ⁸ Iròdu tuu tabita, irumy rare tahe rurukre ele elemy. Tii hāloorehehekỹ-ribi kòdòhònnykre. Iribi tahe rexihukre. Tii rurure idi ixiby dòòsede. Bede iny mahādu bede riòtiinnykre idi heka iròdu debure binamy robirenykreu, bede riòtiinnykre idi. Tiiboho dori ini ihoōre iru tyyritiwo-ki. Tai tahe iròdu deburebina lau ruberure. Iròdu dori ihetxiu irumy rare tahe wiji aōkōre. Idi tii irumy kanankre ixybyle. ⁹ Kia ibutumy adee aritỹnynykre: Debò inataō rati tahe iròdule rare. Kia hāwyy ityre ronyre kia hāwālò wesere. Iròdu rati tule iòlò mahāduō rare, debò inatxi reurò sōwe. ¹⁰ Iruyre iòlò

tahe reserenyire. Sohoji iòlò tahe ratximyhÿre. Ithewotyhy ikonanaludu tahe, kanakre wijina. Tai ibededÿÿnana iòhòlere. ¹¹ Iòlò debòinatao ludu tahe iròdu rare —kia irumy juhuu rare tahe wiji rurumy rare wahe —tii juhuuu iòlò mahãduo rare. Tii tule ituekre. ¹² Debò itue òmy tuu tabitamy wahe tule iòlò mahãdu rare. Tiiboho kanakre iòlòwesemy. Iròdu-wana tiiboho hãwã wedumy ronyrenykre iròdu aõni-wana sohoji horamy. Tii tyytyby bina rare. ¹³ Tyyritiõ riwinykre idi tahe ibutumy ruruna iròdu bina-ò riwahinykre. ¹⁴ Raaõbinanyrenykremy heka Budoeni Riòre-wana. Tahe Budoeni Riòre aõbina-ki haÿnadukre. Tahe ÿju wadee rarybere: —Tii dori butu iòlò, ibutu iòlòna ratximyhÿre. Ibutu inynyrÿ ratximyhÿre. Ijoi heka kia ywimy tii-wana roire itarasaõ-ki. Kia rityhynykremy rÿirerimy ihÿre. ¹⁵ Tahe kia ahohokÿ, berohokÿ tai kia hãwyy rononymhÿré. Tiiboho iny rare ibutu rybe-ribi, bede-ribi wahe. ¹⁶ Debòwiò òmy tuu tabita iròdu-wana heka hãwyy derarenyire. Tii irurawonykre. Tii heka heòty-ò risõmy, riròrenykre wiò wiò. Ityky iribi ritara idi. ¹⁷ Ibutumy inywese rare. Bede bede iny ibutumy rybe òta òta rarybemyhÿre. Tahe Deuxu heka riwahinyre aõbo ixideewimy riwinykremy. Tai tahe aõwaxiny aõ tamywi heka riwinykre. Tai tahe ibutumy iròdu sòhòkÿ taru riwahinykre, Deuxu Rybemyrna bede rÿidi. ¹⁸ Hãwãhãkÿ nihikÿ tabite heka wedena wesemy roire. Kia Hãwãhãkÿ heka ibutu wedu iòlò rare.

18

¹ Tai tahe ijõmy rabire ÿjumy rabire biu-ribi

ròhònryeri. Tii sòwemy iruru rare. Tii sòwemy iloosòna rare. Ibutumy bede ritoosònrye. ²⁻³ Ta ryryre tarurumy tii ryryre: –Babilonia nihikỹ resera! Resera! Katahe aõma wedumy, bede bede iòlò heka tii-wana òta riwinyre. Ibutu iny-ò tamona riwahinyre iòtaòta boho boho. Nawii wixira wixira ibinahakỹ tai rasỹnymyhỹre, tyyty-bybina-wana. Ijohodu mahãdu idi nieru sòwemy ributunyre. Idi rexityhynyre.

⁴ Iribi tahe raholare ixityre rybeõ biu-ribi rareri. Manake hewa, Bòdòhònrye wa kia hãwyy-ribi. Kai heka waijoi toite. Tii-wana bexiòrarunybenykemy aõkõ! Bexiòrarunybenykeki tii-wana, tai tii-wana aõhõkỹmy botỹỹnykre. ⁵ Tii heka iòraru sòwe nihikỹmy ratximyhỹre. Deuxu heka aõhõkỹmy dỹỹnana tamy riwinymy ratximyhỹre iòraru-ki. ⁶ Biwinymyhỹre heka iwese tii riwinymyhỹre wese. Aõ ibinamy ibinatyhymy tamy relekre. ⁷ Aõ ibinamy ròhònrye inatxi bededỹỹnanamy tamy ròhònrye. Ibutumy aõbo tamywimy idi raremyhỹ heka riwinymyhỹ ixideewimy. Katahe iwese aõhõkỹmy rotỹỹnykre tahe rabadewokre. Hãwyy tahe ixidee rarybere: –Jikarỹ ikòlò rare. Wytese anokõ jikarỹ rare. Tiku heka rabadewokõtyhy anohõkỹmy ratykỹnykõtyhy. ⁸ Tai taheka aõwesele heka tamy bedeòtiidỹỹdu kedehemynymy bedeakre: rubu, aõdese, rama uritereribile tamy kedehemynykre. Heòty ibutumy ritoonykre. Deuxu urihixina-di dehudu ratximyhỹre. Tii ruru-di ratximyhỹre. ⁹ Kia bede dinodu mahãdu rahinykre itòdenamy. Tii-wana dori òta òta riwinyrenyra. Tiiboho robikre

wàdà iribi ròhònyereriò wahe. ¹⁰ Irehemy iribi rỹire. Ruberureri iaòhòkỹmy dỹnana lau. Tahe raryberenyre: —Babilonia hãwã, kai hãwã nihikỹ rare. Tahe wiji ituera atximahãte. Kobelãhãxe. ¹¹ Ibutumy aõna-ribi ijohodu rahinykre itòdenamy. Inyõ dorihe iaõ tamy riwydyõmy tamy ijohonamy aõkõ. ¹² Juhuu heka raaõbradyỹmy aõma iny mahãdu ratyre. Womati tỹrỹrỹ riõbranyõre. Tule woumana riwyrerimy ihỹre juhuu. Tykysòwihikỹ wixira wixira heka riwyrerimy ihỹre. Tule òwòrulỹnyre, iròdu nohõmy riwinyrerimy ihỹre. Bede ritxoo ibutumy aõna iòwyhykỹre. Womati òta òta wiwihikỹ riwyrerimy ihỹre. ¹³ Aõma rỹsỹna uri wiwihikỹ tule aderõna wiwihikỹ, tule vỹriwyre, paõ widỹỹna, adỹỹ-wana riwyrerimy ihỹre. Tule maixõmo, broreni, budoeni, awaru, tewe, ityti heòty, tule iny deòdu iòwydimy. ¹⁴ Tahe ijohodu mahãdu rarybere hãwã-ò: —Ibutumy aõna aõna wiwihikỹ ituera, kia kaiboho riwyrerimy ihỹre. Tiu ixityre aõna aõna riwyõtyhy, ixãwira. ¹⁵ Tahe aõna-di ijohodu mahãdu rabadewokre, rahinykre tiiboho dori iòraru-ki raityhynyrenyrene. Irehe-ribi retehere. Ruberurennyre. Ryryreri: ¹⁶ —Kobelãhãxe hãwã wihikỹ. Ibutumy atykysò ituera, awomati wiwihikỹ ituera, woumana, manawiwihikỹ ibutumy ixãwire. ¹⁷ Sohoji òraule ibutumy iaõna aõna ixãwira. Ibutumy hãwòhòkỹ dinodu urile, iwiòhenadyỹdu mahãdu tule suludu mahãdu retehereri irehe-ribi. Tii dori nieru ritamyhỹre iaõna-di. ¹⁸ Iu hãwã wãdàsimy robirenyre tahe, ryryre: —Kia hãwã wihikỹ rare. Ijõ hãwã iwese ihoõhyyre. ¹⁹ Tahe brybysi ityreneny rehurerimy ihỹre. Rahinyreri, ryryreri:

—Bobrekỹ, bobrekỹ hãwã wihikỹ. Aõwesele heka ixãwira. Ibutumy ityhy mahãdu, iaõna rexihura. ²⁰ Tahe kaiboho beysabenyke biu ludu mahãdu. Hãwã nihikỹ dori ituera. Deuxu hõrõ mahãdu, Deuxu deòdỹỹna mahãdu, Deuxu dee rybedu mahãdu ibutumy beysabenyke. Deuxu dori iaõhõkỹmy dỹỹnana tamy riwahinyre aõrauru-ki.

²¹ Tahe ŷju nihikỹ heka manaõ rimyre, mana nihikỹõ, iwese maixõmosyna mana wese wahe. Idi rehure ahobero-ki rehure. Tahe ryryre: Kiawese heka Babilonia hãwã-di arehukemy watrixeri waruru-di. Ixãwikre. ²² Tahe wiu wodỹỹ kia hãwã-ki roholaõtyhyke, harpa wodỹỹ aõkõ, flauta wodỹỹ aõkõ, jurõna wodỹỹ aõkõ. Aaõmysỹdỹỹdu aõkõ kia hãwã-ki raaõmysỹdỹỹõtyhy. Mai rỹỹna, manasya iny heka iwodỹỹ roholaõtyhy. ²³ Loosõna ay-ki ritoosõnyõtyhy. Herina mahãdu rybe ay-ki iny roholaõtyhy. Iaõna ijohodu mahãdu ibutu hãwã-ribi ityhy rare. Tule ibutumy iny riitxenanyre aõtaõta-di, bede bede iny wahe. ²⁴ Babilonia hãwã heka aõhõkỹmy dỹỹnana rotỹỹnyre. Deuxu rybedu mahãdu hãlubu dori kai tetata tule Deuxu hõrõ mahãdu. Rirubunyre mahãdu wahe.

19

¹ Iribi tahe ijoi nihikỹmy roholare. Ryrymy heka rỹimyhỹ sõwemy iny rỹimyhỹ biu-ki. Deuxu deysanamy heka ryryreri: —Wowydynamy Inynyrỹ-ò. Tarasana dori inyDeuxu-ribi rare. Wowydyna, ruruna ibutumy ihõrõle rare. Aõbo tii riwinyré, òbiti rare. ² Aõhõkỹmy dỹỹnana òbiti rare. Aõhõkỹmy rotỹỹnyre heka kia aderana-ki

heka rare. Tii aõhõkỹmy dỹỹnana ritare. Bede iny heka riòrarudỹỹnyre. Tahe Deuxu riòwynyire teòdu rubudỹỹna heka riòwynyire. ³ Ixityre ijoi ryrynyre, rawiunyre: –Wowydyna Inynyrỹ-ò. Wadà raòwònyreri tai rawòsi-ribi. Ihyyemy raòwònykre, hãwã nihikỹ-ribi wahe. ⁴ Tahe ibutumy rejuxunyre Deuxu luukemy. Wawiò inaubiòwa matuari rare. Tule inaubiòwa aõni rare. Deuxu tahe rynana nihikỹ-ki ronyre. Tamy rirajuare: –Kia, Kia, wowydyna deysana Deuxu-ò. ⁵ Iribi heka ròhònyre Deuxu rynana nihikỹ-ribi heka rybeunimy ròhònyre: –Biwowydynybenyke Deuxu-ò ibutumy deòdu mahãdu, ibutumy iny rityhynymyhỹre mahãdu, iyja ta nihikỹ-wana. ⁶ Tahe ixityre ijoi-ò raholare. Ryrymy rỹimyhỹre. Tahe benihikỹlesetere wese heka iwodỹỹ rỹireri, biumytxi wesehekỹle heka iwodỹỹ rỹireri: –Wowydyna Inynyrỹ-ò biwahinyke. Tii iruru dire. Tii heka iòlò rare. ⁷ Ibutumy iny rekeysarenyke. Tamy wowydyna rikiwahinyrenyke. Tii dori inihikỹre. Iòhòra dori kia Budoeni Riòre kia hãwyymy herina kia bededỹỹnana-ò. Worana bedehesi kỹnyikre. Ihãwyy heka rexiywinymy ratxireri. ⁸ Tyyurahakỹle-di rexiytynykre. Awityhymy ityy doimyhỹde wahe. Deuxu dee awihikỹ widỹỹna wese heka kia ratxireri. ⁹ Kiamy heka ýju wadee rarybere: –Kia biritinyke. Ibutumy lobidỹỹna mahãdu reysamy ratxireri. Ýju wadee rarybere ijõ: –Kia heka Deuxule tuu rarybere. Inatyhy rare! ¹⁰ Tahe jiarỹ resere ýjuko-txi ariwowydynykemy. Tahe tii wadee rarybere: –Kia widỹỹõmyke hewa. Jiarỹ

tule Deuxu deòdule heka jiarỹ rare, awesele wahe. Aityhydỹdu seriòre tule awesele rare. Rarybemyhỹre dori Jesuisi tyhydỹnamy. Deuxule biwowydynyke! Ibutumy Jesuisi relyyre heka tuu rybedu mahãdu ritỹnynyre.

¹¹ Iribi tahe tuu rabire awaruurahakỹõ biuwetyky-ki. Inyõ ityre-ki ronymyhỹ. Ini heka Òbiti rare, Inatyhy rare. Tii heka aõbinanymhỹle rare. ¹² Iruè heka heòty wesele rare. Irati heka sówemy raheto rỹire. Iò-ribi heka nii roire, ini wahe. Urile inyõ rieryòtyhy mobo ini rare, tyyriti witxira dori tiile heka rieryre. ¹³ Ihety heka hãlubuhukỹle-di ityre rare. Deuxu Rybe heka inire, hãbu wahe. ¹⁴ Sówemy iny heka awarutyre-ki rỹire, biu-ribi dòidenyde Deuxu Rybe hewomy, soldado wese wahe. Iny ibutumy ityyura-di rex-ityynyre, ityratyhy wahe. ¹⁵ Tii heka mayrehe rabuhukỹle iry-ribi ròhònyrerimy ihỹre. Idi tii heka iny rirubunykemy ibutu bedè bedè-ò. Iribi tahe tii ròhònyre iòlòtyhy tii rare. Aõhòkỹmy dỹñana tamy riwahinyre, ibinatyhymy heka riwahinyre, Deuxu iwona, Deuxu ruruwedu wahe. ¹⁶ Ihety-ki heka iti-ki rỹire iniõ: Iòlò iòlò wedu tii rare, ibutu wedu wahe.

¹⁷ Iribi tahe ÿjumy rabire, txu-ki rỹire. Nawii ibutu-ò rryrymyhỹ: —Bòdòibedenyke heka, Deuxu worana bedehesina-ò bòdòike rỹsỹna birỹsỹbenykemy. ¹⁸ Aõmade biròbenyke, iòlòde, soldadu wedude, iawarude, ibutumy inyde biròbenyke, ixihy mahãdu, deòdu mahãdu, nihikỹ iyja-wana.

¹⁹ Iribi heka tuu rabire aõni binahakỹ,

iòlò mahãdu, tasoldado mahãdu wana. Wii ributunyre aõbinamy. Awaru tyre-ki ronyrerimy kia mahãdu-wana tiiboho raaõbinanykremy. ²⁰ Tahe aõni bina rimyrenyre, rybedu bina-wana. Teròwmy tii aõna aõna wixirawi riwinyre. Iribi ridyrenyre heka heòtyaho-txi idi rehurenkremy, enxofre-di riworonyre wahe. ²¹ Ibutumy isoldado heka ituemy rỹimyhỹre rurumy. Mayrehe-di rurumyhỹre, kia awaru ura tyre-ki ratxireri kia ryribi ròhõnyreri kia-di rurure. Tahe rararesa deadeade ide riròkremy.

20

¹ Iribi tahe ÿju nademy biu-ribi. Irayna heka debò-ki idi rỹire. Hãloonihikỹ rayna wahe. Tule womati rerotihikỹle iruty-ki roire. ² Kia aõni rimyre, Diabo wahe, Satanasi wahe. Inyõ tule hemylala raninire. Tahe 1000 beòra riekre ritaataare womati reroti-di. ³ Idi heka rehure hãloo nihikỹ-ò tahe riratòbõnyre, rirarytxynyre. Tai tahe tii ritixenanyõtyhy bede bede iny. Kia 1000 beòramy bede reakreule, tahe rexihumy iròtena. Urihimyò bededỹñnana bede riijekre, ixihyyle tai ixbyyle ròbòdỹỹkre.

⁴ Iribi tahe rynana sòwemy rabire. Iny ityre ronyreri mahãdu ywisidỹỹdu mahãdu heka rare. Iribi heka tuu rabire Jesuisi dee rurure mahãdu. Inatyhyna rybe tỹnydỹỹ òraru-ki heka rurure. Aõni rityhynyõre, iritxoo rityhynyõre, iritina òraru iòru-ki ritidiõtyhy, deboreny-ki ritidiõtyhy. Rubu-ribi tiiboho rexixarenyre. Kristu-wana ratxireri 1000 beòramy. ⁵ Kia heka juhuludu ixixana heka rare. Ijõ rubu mahãdu heka wiji

rexixaõkre. Tahe 1000 beòramy reareu, tahe rexixarenykre. ⁶ Juhuludu ixixana mahãdu heka reysatyhymy rarekre. Ixyby rubunamy heka ruruõkre, inatxina rubunamy wahe. Deuxu dee, Kristu dee heka tiiboho Xiwena wahidÿÿdumy roirekre. Tii-wana 1000 beòramy riwyrenykre, iòlò mahãdu wesemy heka ratxirenykre.

⁷ Kia 1000 beòra reareu heka Satanasi ixihyymy ròhònykre bedeki. ⁸ Tii itxenadÿÿdumy ròhònykre ibutu iny riitxenanykremy. Kia Kòke bedeki, tule Makòke bedeki rare. Satanasi heka sòwemy iny ributunykra raaõbinanykremy. Tiiboho sòwemy ihÿre ÿnyra sòwe wese. ⁹ Tiiboho tahe ibutu bedeki-rariarenykre ityhydÿÿdu hãwã rirurawonyrenyke kia Deuxu hãwã Deuxudeewi wahe. Idi heòty biu-ribi isòrenymy desede. Idi wewòsimy rururenyre, Deuxu iny mahãdu òludu wahe. ¹⁰ Tahe diabo iitxenadÿÿdureny heka Deuxu rehure heòty aho-ò. Tai aõnibina, ruimy rybedu-wana juhu delemy tamy reserenyke. Tai txumy rummy aõ rotÿÿnyrenyhyyke.

¹¹ Iribi tahe rynanaurahòkÿmy rabire ityre rÿdu-wana. Suu biu-wana iribi rexitare, titxibo iòrenyke. ¹² Tahe iny rubumy rabire, iny ibutumy iko-ki rÿirenyke. Tyyriti rarayre. Ijõ tahe rarayre, irutyyriti wahe. Tyyriti-ribi Deuxu iaõna aõna rierymy aõhebo risÿnykre. ¹³ Ahohokÿ-ribi tahe rubu mahãdu dòhònyde. Rubunahakÿ bedeki-ribi iludu mahãdu dòhònyde. Idi iaõna aõnamyna Deuxu timybo rexinohòtinykremy idi rare. ¹⁴ Idi rubunahakÿ, rubuna-wana heòtyaho-txi idi adehu rÿikre. Kia ixyby rubu rare. ¹⁵ Iru ityyriti-ki inyniõ roiõkeki, tii tule heòtyaho-txi adehu rÿikre.

21

¹ Idi biu tỹmyra sutỹmyramy rabire. Juhusu juhubiutixibo ikõrenyre, ahohokỹ tule. ² Deuxu hãwã wihikỹ tỹmyra desemy nade biu-ribi. Iwese ijadõma tỹmyrawesemy ramyhỹre wese kia hãwã nade. Deuxu-ribi nade. ³ Tahe rybehekỹ biury-nana rỹdu-ribi nade-ò roholare kiamy: —Kahe Deuxu sỹ heka akireny rare. Deuxu icyreny-ki rarekre. Tii iwedurenykre. Tiiboho Deuxu dee roirekre. ⁴ Idi Deuxu irubereny risuhokre. Tai rubu, hii, ibru, txuberere ijõõkre. Bede tyby dori rexihura. ⁵ Idi rynana-ki rỹdu narybede: —Wiji itỹmyramy ibutumy aõna aõna ariwinykre. Wadee tule narybede: —Kia bityyritinyke. Kaa rybe dori rybetyhy rare, ibutumy iny ratyhykremy. ⁶ Kia ixyby narybede: —Ibutumy relera. Jiarỹ dori AA rare YY rare Juhuludu rare ikonanaludu rare. Inyõ bemomo risakeki, tamy iõwykõlemy ariõkre, beòlõnaberu-ribi wahe. ⁷ Inyõ tarasadu heka ibutumy waribi rimykre. Jiarỹ iDeuxu- kre. Tii wariòrekre. ⁸ Idi kamahãdu heòty aõho enxofre-ò rekoarenyre kamahãdu wahe: — Iny brebu, watyhydỹkõdu, òrarudu, maleerudu mahãdu, òta òta mahãdu, iny rubudỹdu mahãdu, hàri mahãdu, ritxoo tyhydỹdu, ruidu mahãdu. Kaboho rubunatyhy-ò rururenykre. Kia tahe inatxina rubuna rare.

⁹ Tahe ýjuõ wadee nade, debò inatxi reurò mahãdu-ò. Tii hyna-di ryireri. Hynawo-ki tahe aõna aõnabina debò inatxi mahãdu-di. Kiamy narybede: —Mana ini, Budoeni hãwyy ini adee ariteòsinykre, hãwyy wese wahe. ¹⁰ Deuxu Tytybytyhy wamy reare. Ýju tahe riwadyre

hãwãlònora-ò. Jerusalẽ hãwã tỹmyra awityhy wadee riteòsinyre. Tii biu-ribi desemy nade. ¹¹ Deuxu loosõna-di yla aõkõ. Tii tahe man-awiwihikỹ wese rarỹỹnymyhỹre. Jaspe wese, womati wese mana wiwihikỹ wese rare. ¹² Tii ijõtòbõna irariere, waðinatxi reuròmý ijõtòbõna, iitxedu ýju tule. Ijò-ki tahe waðinatxi reuròmý Judeusỹ mahãduni wahe. ¹³ Inataõ ijõtòbõna sõwe, iraro-ò, ibòò, biura-ò, beà-ò. ¹⁴ Hãwã rurawona tahe waðinatxi reurò mana tyre-ki rỹimyhỹ. Mana sohoji sohoji-ki budoeni deòdu mahãduni rỹire. ¹⁵ Ýju wadee rybedu tebò-ki womati tỹrỹrỹhỹkỹ deòho-di nade idi hãwã, hãwã ijò, hãwã rura-wona iurihinamy. ¹⁶ Hãwã tahe iurihina wiwesele rare. Tahe 2.200 iurihixina rimyre teòho-di tuu ri-winyre. ¹⁷ Rurawona raru tahe ýju taurihixinamy riurihixinanyre idi 64my rimyre. ¹⁸ Rurawona tahe jaspe mana-di relere. Hãwã tahe womati tỹrỹrỹhỹkỹ-di relere. ¹⁹ Rurawo òraru heka mana wiwihikỹ-di juhumana heka jaspe rare. Inatx-ina safira rare. Inataõna, agata rare. In-aubiò-wana esmeralda rare. ²⁰ Iruyrena sardonio rare. Debò sohoji reuròna sardio rare. Debò inatxi reuròna trisolito rare. Debò inataõ reuròna berilo rare. Debò inaubiò-wana topazio debò ituena crisoprazo rare. Wasohoji reuròna jasinto rare. Wainatxi reuròna ametista rare. ²¹ Woumanahakỹ sohoji-di heka ijò sohoji sohoji relera, 12my ijò wahe. Ryy heka womati tỹrỹrỹhỹkỹhyky-di relera. ²² Tohodỹña heto tahe ihoõhyyre. Deuxule dori tuu rare, Budoeni-wana. Tai ihoõre. ²³ Txuu ahãdu-wana tai ijõõre Deuxu

loosòna, budoeni loosòna dori itxuuxaranarenyre. ²⁴ Bede bede mahādu iloosòna-di rỹikre. Bede bede mahādu heka taaõna aõna wiwi-di tamy kidi-rahukre. ²⁵ Tahe ijò raratòbòõhyykre, tai dori ruu ihoõhyyre. ²⁶ Bede bede iòlò mahādu heka wowydyna-di tamy kidirahukre. ²⁷ Inybina bina, iny òrarudu mahādu tamy ralòõtyhy, ruidu mahādu tule. Inyni heka Budoeni tyriti irumy rỹimyhỹre mahādu sohojile wahe.

22

¹ Idi ŷju wadee riteòsinyre, iru wahidỹỹna bero-hokỹ. Ibelyramy Deuxu rynana, Budoeni rynana-ribi òlòdu wahe. ² Ryrohokỹ tya-di kaa bera namyhỹde iwyoòwyò-ki iruwahidỹỹna bed-erarade rỹimyhỹ. Tii bederarade waò inatxi reuròmym raratynyre. Kia ta ahādu ahādu-di sohojile raratynyre. Otxirarade tahe bede bede mahādu deytana rare. ³ Kia hāwā-ki ihetxi txuhòbina tai ijõõkre, Deuxu aõ ritxuhònyõra tai. Deuxu ryanahakỹ itya-ki rỹikre. Kia teòdu mahādu riwowydynykre. ⁴ Tiiboho iòsỹnymy ro-bikre inireny iòru-ki rỹikre. ⁵ Tai ruu ijõõkre. Tai txuloosòna ijõõkre. Deuxu dori itxurenykre. Tiiboho tai ihyymy rỹikre iwese iòlò mahāduõ.

⁶⁻⁷ Kia tahe ŷju wadee rarybere: —Kaa rybe tahe inatyhy rybe rare. Bityhynybenyke. Jesuisi rarybere: —Analekre heka tule adehemynylekre heka. Deuxu heka taỹju deòdu adee kanarybekre. Kaheka wylemy ibededỹỹnana kedeakre. Deuxu rarybehyy ratximyhỹre tỹnydỹỹdu mahādu-ò, aõhebo bede rotỹỹnymyhỹkremy roimyhỹré.

Ibutumy kia tyhydÿÿdu mahãdu heka reysamy rÿikremy rÿira.

⁸ Jiarÿ tahe Joaõ rare. Rabirahe, ibutumy kia raholare. Rabimy rexihurau tahe, jiarÿ watiowotimy resere ÿjuko-txi. ⁹ Ixityre wadee rarybere: –Iwidÿÿõmy hewa, Jiarÿ heka Jesuisi deòdu tÿnydÿÿduõle jiarÿ watrixeri. Ibutumy Deuxu tyyriti ityhydÿÿdu biòwa jiarÿ rare. Deuxule bityhynke.

¹⁰ Tahe ÿju ijõmy wadee rarybere: –Aõbo teritidÿÿnyteri ibutumy iny-ò rybe bitÿnynke. Kia bededÿÿnana iòhòlemy ratxireri. ¹¹ Kia bededÿÿnana kedehemynykreu, aõbina bina widÿÿdu heka aõbinale riwinykre. Iny binabina heka, ibinamy rÿikre iu. Inywiwihikÿ tasÿ awimy rÿikre iu. Kia òbitimy rÿira tahe, awityhymy relekre, òbitityhymy rÿira. ¹² Boholake warybe-ò, aõwesele heka anakre. Uriõno heka adiwymy wadi anawãhãde. Aõbo wadee aõ riwinymyhÿre wahe iwese aõbo riwinymy raremyhÿwesemy heka araòwynykre. ¹³ Jiarÿ heka AA jiarÿ rare. YY tule jiarÿ rare. Tyyriti juhoo rare. Tyyriti konna rare. Jiarÿ heka juhuludu rare. Ihewoludu tule jiarÿ rare, ibutumy wahe. ¹⁴ Ibutumy tatytyramy rÿira –teysamy rÿira. Tiiemy teysahyhy rare. Iru òwòru wahidÿÿna bederaty heka ritokre. Tule rarònyrenykre kia hãwãhãkÿ-ò. ¹⁵ Ibutumy òrarudu mahãdu tule òwòru widÿÿdu tahe irehemy Deuxu hãwã-ribi nyimyhÿde. Tule iny rirubunymyhÿre mahãdu, tule suritxoo luunadu mahãdu, tule ibutumy ruidu mahãdu. Ibutumy irehemy hãwãhãkÿ-ribi roimyhÿre.

¹⁶ Jesuisi heka jiarỹ rare. Waỹju reteònyre adeereny kia aõnaaõna bededỹyna relyykemy. Kaiboho heka dohodỹyna heto mahãdu-ò relyyrenyke. Jiarỹ iòlò Davi juhu rare, tule Davi riokore rare. Biurasò taina Jiarỹ rare, loosòna rare.

¹⁷ Deuxu Tyytybytyhy rarybere: –Manake! Tule hãwyyimy hãbumy heridu tule rarybere: –Manke! Ibutumy ijohodu tule marybeke: Jiarỹ, Juaõ, tule rarybere: –Manake! Ibutumy iny bemy rurumyhỹre mahãdu tule manake irube biõke. Iòwy-di aõkõ heka rare.

¹⁸ Jiarỹ, Juaõ, rarybere ibutumy iny katyyriti rariamyhỹre mahãdu-ò. ¹⁹ Iny ributunyekeki aõmybo kaki ritydỹyna roiré, Deuxu tamy bededỹyna binahakỹõ riwahinykre karitidỹyna roireki. Inyõ karitidỹyna-ribi ritakeki, Deuxu òwòru runa ijuraõ wahe heka iribi ritakre tule Hãwãhãkỹtyhy-ribi nadedi wahe. Tai rỹire tyyriti-ki.

²⁰ Tule aõmybo narybede inatyhymy tule rarybekre (Jesuisi wahe): –Analekre hewa idi. Ara-roorehenyõtyhy. Juaõ, tule rarybere: –Kie, Manake Wanyrỹ Jesuisi.

²¹ Deuxu deysana, Inynyrỹ Jesuisi Kristu kia deysana ibutumy adee kanakremy watxiwahãre.

Deuxu Rybe Tyyriti **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 21 Feb 2024 from source files
dated 29 Jan 2022

55ce0bcd-101e-52a3-984e-847027efe150